

**Uunga siunnersuut: Meeqqanik pinerliisimanginnermut uppersaatinik piunasaqaateqartussaataaneq pillugu Inatsisartut inatsisaata allangortinnera pillugu Inatsisartut inatsisaat**

(Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

**Saqqummiussissut**

**Siullermeerneqarnera**

Matumuuna Naalakkersuisut sinnerlugit Meeqqanik pinerliisimanginnermut uppersaatinik piunasaqaateqartussaataaneq pillugu Inatsisartut inatsisaata allangortinnera pillugu Inatsisartut inatsisaat saqqummiutissavara.

Siunnersuut aalajangiiffigisassatut siunnersuutip UKA2019/49-p Inatsisartunit akuersissutigineqarnera tunngavigalugu suliaavoq, tassanilu meeqqanik pinerliisimanginnermut uppersaati piniartarneranut pisussaaffik pillugu Inatsisartut inatsisaanni meeqqat ukiuisa 15-iniit 18-inut annertusineqarnissaa siunertaasimavoq.

Siunnersuummi takuneqarsinnaavoq inuit sulinerminni meeqqanut 18-it inorlugit ukiulinnut toqqaannartumik attaveqartartussat atorfinitsinneqartussanngorpata imaluunniit sulisinneqartussanngorpata kiisalu inuit sulinerminnut atatillugu meeqqat 18-it inorlugit ukiullit aalajangersimasumik akornanniittartussat, taamaalillutillu meeqqanik taakkuni nnga toqqaannartumik attaveqarnissamut periarfissaqartut meeqqanik pinerliisimanginnermut uppersaatinik pissarsiniartoqartassasoq.

Tamatuma saniatigut UKA2019/49-mut isumaliutissiissummi qanoq iliorluni meeqqanik pinerliisimanginnermut uppersaammik piniartarnermi pisussaaffiup assersuutigalugu bussini ingerlatitsisunut, taxanik ingerlatitsisunut aammalu umiarsuarni angallassisartuni aamma angallatini angallassisartuni umiartortunut atuutilersinnaaneranut apeqqut attorneqarpoq. Tamanna nangillugu siunnersuummi takuneqarsinnaavoq toqqaannartumik meeqqanut attuumassuteqartunik assartuinermit ingerlataqarnermit atatillugu angallassinermik ingerlataqarfinni sulisunik atorfinitsitsinermit meeqqanik pinerliisimanginnermut uppersaatinik pissarsiniartoqartassasoq. Taamaalilluni assersuutigalugu taxanik ingerlatsisunut meeqqanik suliaqartunut aamma timmisartuni saqisunut meeqqat kisimiillutik angalaneranni ikiuisunut naleqqiullugu meeqqanik pinerliisimanginnermut uppersaatinik pissarsiniartoqartassaaq.

Tamatuma saniatigut siunnersuummi innersuunneqartunut pinerluttulerinermit inatsimmi malittarisassanut attuumassuteqartunut nutaanik innersuussinermik siunnersuut imaqarpoq.

Tamanna pinerluttulerinermi inatsimmi kinguaassiutitigut pinerluutit pillugit malittarisassat allanngortinnerinut 2019-imi naammassineqartumut atatillugu isigineqassaaq.

Taamatut oqaaseqarlunga siunnersuut Inatsisartunut oqallisigisassanngorlugu ingerlateqqippara.